

Öise Lade 1-2010, p. 54

Tge tip essas Vus? Plitost chatschadra u collectadra resp. chatschader u collectader? Jau sun definitivamain omadus. Betg in'acziun lasch jau passar – u almain betg gugent – e ma legrel adina puspè dad ir giun tschaler ed ordinar mes



Chatschadra

e collectadra passiunada

stgazis tenor data da scadenza: stgatlàs da conservas, ielis, aschieus, confituras fatgas mezza, etc. En pli ma smirvegl jau adina puspè stond a la cassa en butia ch'insatgi po cumprar sulettamain ina stgatlà ton, ina conserva graunins da tirc, in pac ris u in mez kilo spaghettis, u mo ina pasta da dents u in sulet schampo. Talas chaussas na cumprel jau da princip betg cura ch'ellas n'èn betg acziun, u mo sche jau hai tuppamain manchentà in'offerta speziala e stoss exnum avair ellas. – Per fortuna vegn mes char mintgant da franar mai, uschiglio stuessan nus prest affittar er anc il tschaler dals vischins, pertge che trair a niz las chaussas magasinadas na fatsch jau alura era betg gugent. Quant simpel fissi en sasez dad ir svelt giun tschaler, vegnir siadora cun duas u trais ingredienzas e far ina buna tschaina cun quellas? Na, pli gugent anc curren svelt en butia e cumprar insatge auter per gea betg stuair prender ina chaussa or da las reservas...

Ma almain sun jau ussa conscianta da mia passiun da chatschar e collectar, uschia ch'i po gea mo vegnir meglier. E grazia a la nov'ediziun da l'Öise Lade ves jau ch'ins po cuschinar cun paucas ingredienzas ina tratga gustusa che survegn segir era bler laud – uschia ma concentresch jau ussa simplamain sin la chatscha da compliments!

Stai bainin e buna chatscha.



Angela Schmed